

四庫全書

集部

欽定四庫全書

潞公文集卷三十二

宋 文彥博 撰

陳乞

乞罷男機宜

臣男宣德郎守太子右贊善大夫管勾永興軍一路安撫使司機宜文字恭祖昨以臣被詔赴闕將帶隨行結絕本司文字今並已了畢欲乞依例隨本使罷任朝見歸班取進止

臣男恭祖慶曆中自鳳翔府僉判罷任赴闕臣方在
政府首尾五年並不令就差遣今來忝升朝籍須逐
日赴朝參與百官同幕次恐涉謗議只欲令于審官
院依例就一合入遠闕庶免逐日與移朝官相接合
具奏知

乞差使臣

臣隨行合差指使三員臣昨丁母憂已發遣使臣兩員
歸班今却差侍禁葛宗望殿直呂世良充隨行指使所

有逐人各係合入親民羌使欲乞各理為親民羌使取
進止

其葛宗望呂世良並係充短使合入親民羌遣人數
乞依例各支與大添支請受

乞張熙恩澤

臣昨丁母憂河南府差教練師張熙管勾墳營壘事首
尾二年有餘幹事得力欲望朝廷量賜恩澤於本人牙
職上遷補一資取進止

乞郭宣恩澤

臣有隨行教練使郭宣隨臣勾當近二十年有行止得力今者因臣忝恩移鎮欲望朝廷改補一三司大將名目且在臣處驅使取進止

乞門客張度恩澤

臣有門客教授張度累舉進士南省下第先于皇祐五年以臣奏薦蒙恩授試將作監主簿不理選限自後本人又曾鑠應省下今來兼係先朝皇祐二年明堂已前

到省舉人合該免解欲望聖慈念其久歷科場家貧親
老未霑寸祿乞補一三班差使名目量與減年轉補取
進止

請假劄子

臣昨暫請服藥假兩日伏聞特降中使就臣私第傳宣
撫問臣已于今月二十六日早赴樞密院管勾本職公
事訖謹具奏聞謹奏

已具狀附傳宣中使奏謝去訖

謝男貽慶換授文資及章服表

元祐元年

臣某言伏蒙聖恩除臣男供備庫副使兼通事舍人同
勾當軍頭引見司貽慶充奉議郎守尚書都官員外郎
并賜緋魚袋者仍覩告詞謂老臣弼亮三世粗有微勤
以愚息乞換文資特推寵命舉族知幸受恩若驚臣誠
榮誠感頓首頓首切以朱紱身章文昌郎位皆為殊選
悉非材仰戴丘山如臨淵谷此蓋伏遇陛下仁深育
物道廣納荒既不棄于菲葑亦兼錄于闕闕致茲蒙陋

過有忝塵敢不嚴以教忠勤於從政力著涓微之效仰
酬覆燾之私臣無任

陳乞堂弟

大

西京差遣

臣先准勅于西京立家廟四室臣多在闕下守官或外
守方面則西京常有子弟兩三人在彼守官以奉家廟
四仲祭祀今以臣諸子並丁母憂解官持服並無子弟
在西京守官奉祀今月臣親堂弟朝請郎大同近因相
州僉判得替欲望聖慈乞差充西京一合入差遣所貴

家廟歲時得人奉祀取進止

奏程珣葬事

臣竊聞太中大夫致仕程珣身亡珣素履清介守分安貧久歷外任皆有聲稱身沒之後家事索然只有一子程頤素蘊學行見推士林向為邇英講官因緣經義開陳治體上資聖政今其父之亡窘于襄事伏望聖慈特賜矜憐優與賻恤以周其急伏候進止

奏孫男扶掖

臣有長孫男右通直郎永世自來每遇臣入殿扶掖近
蒙恩除權發遣提舉三門白波輦運公事奉聖旨令候
扶掖了日朝辭今來本任闕官日久春運是時及已差
官管押牌印到京多日臣近有以次孫承事郎康世自
西京來迎接臣到京欲乞令康世暫權扶掖替永世交
割管勾赴任取進止

奏富相公薨乞與免納馬價錢

元豐六年十一月

臣勘會武寧軍節度使行尚書左僕射同中書門下平

章事鄭國公富基于今年閏六月二十二日因患身薨
所有前後未納馬價錢見蒙省符催理今來任罷請受
無可尅納謹具劄子奏聞伏望聖慈下有司依例特賜
除放謹奏



潞公文集卷三十二

欽定四庫全書

集部

潞公文集卷三十三至
六

詳校官庶吉士臣范逢恩

檢討臣何思鈞覆勘

覆校官中書臣呂雲棟

校對官中書臣鮑之鍾

謄錄監生臣任應統

欽定四庫全書

潞公文集卷三十三

宋 文彥博 撰

乞罷重任

御書批答

皇祐元年

卿近進乞解罷重任為遷葬事於私實便於公似有所妨今正使卿當其國政推誠委用君臣同體所求難從所便更不消再上封章乞退所請宜不允付文某

第一劄子

熙寧二年

臣伏望聖慈以臣上表乞解重任求領近郡特降宸翰封還臣章諭令勿再上者君父之命理當必從臣子之志亦有所守臣蒙被厚恩忝塵近位豈欲輕去軒幄自取踈外誠以年事衰晚精力減耗不能則止須合自陳若覲然尸祿必當濼官祈解樞衡願假符守庶寬職責稍息疲癯惟陛下天地父母哀而憐之必賜開可無任

又

臣以非才久塵重任衰老疲繭力不勝任惟極至誠上

干宸造必祈矜憫俯賜俞從雖更多言無易此懇豈敢
喋喋徒煩聖聽切見知河陽陳述古到任已久臣雖愚
短願假符守猶冀勉駕粗寬西顧臣無任

又并手詔一
封同封回

臣伏蒙聖慈以臣上表乞守外郡特賜批答不允仍令
斷來章及差中使傳宣撫諭即時已附狀先具奏謝伏
念臣于今早得對嚴宸且陳至懇必期天造俯從人欲
豈謂犬馬微志未能回益高之鑑伏地循省但極兢惶

臣被遇三朝豈敢輒圖安逸實以衰朽難當繁務庶得
許從外補稍遂休養異時或委繁使豈惜捐軀論報又
以今茲表裏寧謐愚臣方敢陳請伏望聖仁憐察必賜
俞從臣無任

又

臣累上章表罄竭至誠未蒙天慈矜察雖欲再三披露
無易前懇固不敢重複煩言仰瀆聖慈然屢為詔旨伏
積兢惶亦不敢輒自歸司敢涉於沾激今當待罪私門

恭候朝命萬一天慈矜恕俯徇愚懇許從外補稍貸疲
駕則老臣蒙更生再造之恩不勝大幸謹具奏聞伏候
進止

又

臣伏蒙聖恩特降中使封還臣今日所上劄子及傳宣
撫諭便令供職者螻蟻微誠不能感動天意又以屢違
詔旨退伏私居以待嚴譴雖至仁寬貸而未俞勤請區
區所懷隕越無措臣愚尚冀天慈垂憫必從所欲假以

外補稍寬疲繭情迫於中言無倫次臣不任惶恐俟命
之至謹具奏聞伏候進止

又

熙寧四年

臣伏蒙聖慈封還臣所奏劄子以臣陳乞外補未賜俞
從仰味聖言伏增感懼切以犬馬之微猶知戀主況臣
奉事尤右行將五年至仁涵容厚禮優假豈當輕去軒
幄自取踈外直以衰老疲劣勉強不前覆餗是虞履冰
如慄然每欲陳請必深愧畏內惟悃悞終冀矜從伏惟

陛下天地大恩日月委照俯從所欲俾守外藩勉其寸
長尚可圖報臣無任

又

熙寧
五年

臣內訟非才久塵大任已瀝誠懇仰叩高明祈解樞機
之近司并還將相之兩綬得以散秩假守使州必冀聖
慈俯從人欲重念臣齒髮衰殘精力減耗不能則止自
知甚明當退一也久妨賢路無補聖政當退二也賦性
孤拙與時多違當退三也所當退者三而晏然尸位陛

下聖明以臣為何如人天下清議以臣為不知止臣雖
愚蠢粗有肺肝夙夜以思不遑啓處恭惟天地至慈不
使一物失所伏望亟發俞旨俯遂勤請臣無任

又

臣聞慈父不能愛無益之子仁君不能畜無用之臣如
臣不才可謂無用臣自叨樞筦首尾八年訖無猷為上
贊述作官忝空徒任居諭道而無一論可裨聖政職兼
常伯責在納言而無一言可回天聽加之衰朽寢以耗

昏尸祿若斯醜顏至甚是敢力傾懇悃薦拜封章祈解
樞機之近司并還將相之劇任得以散秩假守便州庶
道人言免妨賢路伏望陛下憐其舊物貸以寬恩未責
曠官亟從所欲臣無任

又

臣伏蒙聖慈以臣乞解重任未賜俞可特降中使封還
臣所上劄子并傳宣撫諭已具奏謝切念臣年齒衰殘
雖任樞務累年以來頗乞出補閑郡聖慈全度終未允

從今以西事向寧及密院忝除副使臣方敢再申前請
必望聖慈俯從所欲臣無任

又

臣以累具奏封乞解重任私居俟命未奉俞旨薦被聖
聽臣自前日入見陟降俯伏及歸私第左膝轉加腫痛
欲望聖慈許臣在假五七日將息稍得平愈即當入見
伏候進止

又

臣以衰老不才久玷樞筦比年以來奏章數十上祈解
重任乞從外補聖恩存錄未賜允俞蓋犬馬微誠不能
上動天聽日勉一日于茲八年精神內竭筋力外耗今
以邊事寧息力伸前請必冀聖慈俯遂人欲臣復內訟
才拙望輕精明不能洞幾微重厚不能鎮浮薄于國之
謀固多踈闊為臣之義自當退默伏望聖慈憫憐舊物
尚假寬矜終賜保全早從所欲臣不任

又

臣累乞外郡直以衰老無補勉強所難惟望聖慈矜貸
許其均勞累蒙敦諭令赴朝供職雖出對天光口陳誠
懇陛下必加存眷未容解去臣子之情仰荷宸意難以
喋喋固辭須至不避嚴誅有違聖旨俯伏私居必期得
請臣無任

臣辭窮意切伏望聖慈早賜矜可

又

臣皇恐臣之至誠危懇備瀝於累章而天聽益高未賜

俞允仍俾亟復其位未即奉詔伏深惶懼嚴誅重譴所不敢逃然臣所恃者聖仁如天必加矜察是以不避再三之瀆猶敢控陳伏望憫臣久勞精力耗竭許從外補以保衰年臣無任

又

臣累具奏章乞外補未蒙俞可及連遣中使撫諭亟令供職愚誠懇切久不奉詔以是自訟俯伏待罪然猶仰恃聖慈必從所請臣無任

又

臣伏蒙聖慈特降中使封還臣乞外補并待罪劄子及傳宣撫諭已別具狀奏謝切念臣止緣衰老無堪久妨賢路連章累奏罄竭懇誠必望聖慈特賜矜允仍乞於冬至節假前早賜處分臣無任

又

臣上章乞守外郡私居俟命於茲累旬今冬節假開伏望聖慈矜允早賜處分

又

昨晚蒙降中使撫諭及封還臣所上劄子至夜即聞鑼
學士院必謂已降指揮遂臣所請今即知是降德音於
河隴臣今不避譴責私居待罪須至再有陳請伏望聖
慈矜允

又

臣以齒髮衰殘精力減耗數年以來累乞解罷重任出
守近郡聖慈念舊未忍遐棄愚衷雖切天意未從去冬

伏蒙聖恩矜其疲繭許至今年同天節後聽從外補德音親被睿旨丁寧復云不須上表即便踐言臣今更不敢別上章表仰瀆天聽伏望聖慈特申前命錄臣向時累奏許解重任假守近郡臣無任

又

臣伏蒙聖恩特降中使賜臣詔書以臣乞解重任外補近郡未賜俞允尋具狀奏謝伏念臣年齒衰殘精力減耗內省尸素日虞曠敗數年以來懇求外補庶勉妨賢

而聖度含容未即遐棄緣去冬懇請蒙聖慈憫勞俟至今年同天節後聽解重任許從外補且云不須上表便可舉行臣方敢再瀆天聰必期得請臣竊謂天子固無戲言王者必信出令伏望聖慈憫臣衰疲允臣勤請臣無任

又

臣以去冬親被德音許至今年同天節後聽解重柄出補近郡仍云不許更上章表便可舉行定命臣所以祇

具劄子自陳必謂便降諭旨今乃申遣中使特賜答詔
加以敦諭亟令復位即垂誠願深積兢惶須至別具表
章再瀆宸聽庶期矜察允從仍乞只據臣今所上一表
早賜處分臣無任

又

臣丹誠至懇已罄竭於累奏更無可陳述惟仰告天慈
憐其衰老許其外補聖言可復人欲是從臣無任

又

臣昨日隨表上手劄子再瀆天慈蓋臣之丹誠至懇已窮極布露更無可陳惟仰告聖慈天地父母哀而憐之俯察危衷許從外補臣無任

又

被俞音今茲邊事既寧老臣必期得請祈天俟命願賜哀憐臣不任

潞公文集卷三十三

欽定四庫全書

潞公文集卷三十四

宋 文彥博 撰

乞致仕

劄子

臣以年齒衰老耄數年之間累上章奏乞致官政聖慈存
念薄物未賜俞允今春以來尤加昏耗伏望矜其疲繭
聽還印綬俾歸田里以保餘年臣無任

今年二月終蒙聖恩差入內供奉官馮景賜臣詔書

不允所乞及不令更上文字臣尋附馮景口陳誠懇
俟過同天節獻祝聖壽以表臣子之誠即當更上奏
章乞致政不審馮景曾敢奏否

又

臣累乞致仕未蒙允從披露懇誠罄竭辭語惟望聖慈
矜允聽還印綬許歸田間臣無任

又

臣於五月二十四日再上章及具手劄子陳乞致仕臣

至中夏以來頻傷炎暑時若腹疾伏望聖慈矜其羸老
聽還印綬許歸田間天地大恩於臣至幸臣無任

又

臣累乞致仕未被俞旨既緣迫切之誠難避再三之瀆
今輒繼陳章奏數冒天聽兼臣自夏以來暑氣所侵腹
疾時作雖欲勉強實難支持伏望聖慈俯詳累奏早賜
矜從聽歸田里臣無任

又

臣以未遂致仕之請乞納使相印綬求領宮觀伏望聖
慈憫臣衰老早賜指揮所冀三伏已前赴洛免冒盛夏
以保疲羸臣無任

又

臣犬馬之年七十有五以當致政而章數十上未被俞
旨迫於激切之誠須至再三之瀆臣今乞還使相印綬
求領宮觀職名所冀殘年稍遂休息况有成例伏望矜
從臣無任

又

臣累上表章陳乞致仕伏蒙聖慈屢降詔旨曲加敦諭未賜俞從乃俾斷章不令復請臣今祇服丁寧之訓勉從夙夜之勞即欲繼上封章實恐頻致煩瀆然臣桑榆景晚犬馬力殫未遂挂冠深虞覆餗仰祈宸造俯察愚衷俾諧休退而歸庶全終始之節臣無任

又

臣累乞致仕未蒙俞可念臣桑榆景晚犬馬力殫德薄

位高任隆責重非惟忝據已久實亦勉強難任不避嚴
誅仰干宸造伏望聖慈憫臣羸老聽還印綬許歸田廬
臣今不敢以重復繁詞別具章表深恐頻繁聖覽止於
直布危懇手陳至意所冀易聞天聽早遂俞音臣無任

又

臣伏蒙聖慈以臣累上奏章陳乞退休特差中使傳宣
撫諭矜臣羸老察臣懇誠申以季秋之期當可露章之
請此蓋陛下仁深化育道廣生成必以當盛夏炎燠之

時非老者行役之際俾及秋抄使遂首塗上戴鴻恩感
極以泣臣已附表奏謝別具劄子布區區犬馬之誠無
任

又

臣伏蒙聖慈特遣中使賜詔書丁寧撫諭以臣頻年上
章累求致仕前後敦諭已極重複都不體諒者臣仰被
宸旨俯積兢惶深味聖言復增感涕緣臣年衰位重已
極滿盈福過災生日虞顛覆是以頻有干瀆懇祈退閑

今蒙恩旨令臣少為逡巡且停來奏俟將來郊祀禮成
當有處分重言而天炳若星日臣之所請休致今則有
期更不敢繼上奏章喋喋煩瀆甫過嚴裡恭俟俞旨臣
無任

劉御藥回附口奏

聖旨以某頻上章求致仕前後敦諭已極重複都不體
諒者始初聞命深積兢惶然深味聖旨復增感涕蓋某
年衰位重深懼滿盈之災遂致頻有干冒今蒙聖旨令

某少為逡巡且停來奏俟過郊禮當有處分則某所請
休致今遂有期更不敢繼上章煩瀆才過郊裡恭候俞
旨

隨表劄子

臣元豐中犬馬之年七十八先帝憫其疲老許以退休
伏自皇帝陛下太皇太后陛下臨政起臣於林下追赴
闕庭仍俾平章重事昏耄非才固辭不獲今已三年有
餘力所不支深慙尸素頻年請退意未許從臣今年事

此元豐中又益老耄加之多病伏望聖慈意許從懇迫之誠遂其退歸之志

又

臣以年過耄耄已具表并劄子懇祈休退茲者必望聖慈矜從臣以羸瘠自京至洛六驛難以乘坐檐子遠行切欲及此洛汴未凍間乘舟至洛稍得安穩伏望俞旨便可促裝臣無任懇切祈天俟命之至

又

臣近上章并累上劄子懇乞伏蒙聖恩頻賜詔書教諭未亮至誠緣臣年將九十固難任職但爵齒之高謂可表率多士而又德薄望輕不能鎮重風俗以此自度乃知素飭宜宜久處然臣之至懇切在乞身而歸得遂正丘之志其幸甚矣伏望聖慈憫憐其誠早賜俞旨

又

臣近累上表章劄子請休致已竭精誠惟望聖慈矜憫早賜俞從令臣得於洛汴未凍已前乘舟而歸使疲老

免陸行之勞臣本欲入對軒陛口陳至懇又以腹臆未
寧未敢趨朝俟得請勉力入謝臣無任

又

蒙降批答不允仍斷來章臣以詞情懇切累上奏章誠
知煩瀆之過然臣衰疲不能任事惟望聖慈深賜軫憐
必從其請遂其退閑臣無任

又

元祐元
年二月

臣懇迫之誠已具累章上瀆宸聽念臣爵祿年齒皆極

盈滿以致災患嬰疾未平伏望聖慈特垂哀察仍乞不
候批答臣所上累表便賜俞旨蚤得去位庶免疾顛以
全衰朽臣不勝激切俟命之至取進止

又

臣歷觀前代輔相之臣勲德重望為時倚賴者及其老
或病乞身以退時君憫勞矜老多遂其請所以全人臣
進退之禮敦君父始終之恩如唐之房杜姚宋裴度輩
可謂賢相時之倚重而宋璟裴度以老疾求退皆遂其

請且謂成人君養老之恩臣以非才不敢比於前賢徒以遭逢聖世忝竊過分又其年過耄耄必望聖慈矜憫許其退歸無任

又

元祐二年

臣自去年秋冬及今年夏秋以年老疲滿累上章乞退未蒙允許乞候興隆節後必望矜從今已經聖節上壽禮成伏望聖慈察臣懇誠臣乞骸歸老臣不敢別具表章慮頻瀆天聽伏乞早賜矜允臣無任

又

臣以衰老不任職事不避頻煩聖聽今早已入劄子乞
退歸丘園臣之情誠極於迫切緣桑榆之景垂盡鐘漏
之期不永安能任重致遠惟望聖慈憫其疲繭乞與骸
骨使遂首丘之望臣於私第日俟俞音無任

又

臣以衰殘久爾尸素累貢誠懇乞歸林泉私居俟命未
被俞音諸司以奉旨不接臣文字須至乞對口陳至誠

必望聖慈濟發德音亟從所請臣無任

又
元祐
二年

臣以衰老連年懇求休退近上劄子乞歸蒙聖恩賜詔未獲俞從愚誠迫切啓處不皇念臣新年八十三歲桑榆晚景固無幾何勉強疲瘁誠難支久臣切以唐之裴度一代宗工中外具瞻年未七十曾平章重事尚止留京師裁及百日遂得請而退如臣之虛薄忝冒聖恩至優極厚伏望太皇太后陛下皇帝陛下察臣愚懇許賜

退歸臣無任

又

臣伏蒙聖恩賜詔敦諭以御戎之策未有定議京東西河朔薦飢切在圖議臣切以太皇太后陛下臨御以來德澤霑洽人心歡泰廟堂哲輔皆陛下高選訐謀獻納萬務畢舉而老臣昏拙廁於其間一無裨補但勉強疲駕焉能支久伏望太皇太后陛下天地父母哀而憐之乞與殘骸俾從休退旦暮之人豈伏望丘園之樂臣無

任

又

元祐四年十一月十八日

臣載瀝愚誠上干宸聽伏念臣自熙寧元豐間累乞休致前後凡八九年蒙先帝哀憐許以謝事退居林下曾未三歲伏遇皇帝陛下太皇太后臨御之始起自田里已逾八十累蒙召旨甚嚴敦迫上道俾之平章重事弗獲固辭迨今四年尸素已甚奚自被命而來繼乞退歸前後章數十上未蒙矜允而臣年益篤老智力皆殫念

終無補報萬一加之連年多病昏耄弗支近者兩上封
章七具劄子再乞致仕天聽未回仍不許收接文字區
區愚衷無以自達匪勉強逾月復遇興龍誕節幸遂稱觴
常諧得謝之期懇迫之情輸竭以盡臣今更不敢別具
表章上瀆而况陛下眷留老臣前後恩禮已極亦不敢
更煩詔諭伏望聖慈哀憫亟降俞音許遂退休激切之
甚旦夕俟命

今年過明堂大禮累陳乞休退未蒙矜可尋奏乞候

過興龍節上壽伏望聖慈矜憫疲瘵早令休退

又

十二月十八日
手劄子將上

臣昨過明堂大禮陳乞休致未蒙矜可尋乞候過興龍節上壽今已具劄子奏上伏望聖慈必賜允從

又

十二月十九日

臣已具劄子奏乞解罷重任復致官政具述四年之間章數十上誠懇殫竭年過耄耋力難勉強兼蒙聖恩眷留前後禮意備至更不敢別具表章只乞亟降俞旨臣

昨日入對面告聖慈激切之誠控陳已盡義無可留必望哀憐老臣曲垂矜久聽遂乞身之請俾全終始之恩臣見今居家日夕俟命伏乞蚤賜處分臣無任

又

十二月二十日

臣近以年齒昏耄久尸重任力不能強義無可留已累具劄子再伸前請乞遂休退亦嘗面叩聖慈具陳懇款仰祈哀惻必賜矜從伏望速降俞旨不敢更煩詔諭臣無任

臣累曾面奏以羸老難以陸行欲於正月乘船歸洛
今去歲止是旬日伏望早賜降制處分

又

十二月二
十一日

臣以累具劄子陳乞致仕日夕俟命至今未奏俞旨念
臣誠懇迫切前後所陳固已備極不避煩瀆聖聽期於
得請乃已伏望皇帝太皇太后陛下天地父母哀而憐
之亟發德音特垂矜允臣無任

又

十二月二
十二日

臣已四具劄子陳乞致仕誠懇罄竭得請是期臣見今
家居俟命日夕以覲仰惟聖慈必諒良懇伏乞早賜俞
旨臣無任

又

十二月二
十三日

臣近者累具懇誠再申前請乞解重任復遂退休并嘗
入對仰叩聖慈罄陳悃悞伏蒙皇帝太皇太后察其至
誠憫其篤老特降詔書俯垂矜允仰荷終始保全之賜
實踰天地父母之恩奉承諭言不勝感涕臣前具奏聞

俟至後月汴洛水善乘舟西歸今已恭依詔旨少留至
二月上旬啓行欲望聖慈速賜降制處分臣今家居日
夕俟命下入謝以叙感恩荷戴之誠

臣授命之後告謝正謝禮畢尚當數次入對方敢朝
辭以盡犬馬戀主之誠兼正月假日甚多比謝辭禮
備已及春和伏望旦夕先降制命

又 二月初
五日

臣以羸老累乞退休伏蒙聖慈哀憐特降詔書許至春

和當從所請今已春和日候降制伏望聖慈早賜處分
臣無任

又 二月十日
三日

臣累乞休退已蒙聖慈矜許居家俟命今已累旬伏望
聖慈早降處分況氣候暄和舟行便於羸老臣無任

乞早賜付外施行

此劄子不降出十五日降麻除兩鎮致仕仍加食邑

實封

潞公文集卷三十四

欽定四庫全書

潞公文集卷三十五

宋 文彥博 撰

辭免

免充禮儀使

至和二年

右某蒙差人送到牒一道為迎奉太祖皇帝御容孝明
皇后聖容赴開先殿奉安奉勅差某充禮儀使伏緣某
將及都門未經入覲況未授命即預相儀實恐非便已
具劄子奏乞改命大臣充使所有元勅一道謹具送納

中書

辭免公使錢

治平四年

臣今早進呈宗室公使錢文字蒙顧問體例臣因便奏陳極密使帶節度使不當例受公使錢去歲曾奏乞請罷當時雖未蒙俞旨然臣必不可請受臣近移鎮永興軍又准宣接續支賜公使錢今檢到去年八月奏劄子一宗文字謹具進呈伏望聖慈許從請罷非惟遂臣素志亦冀粗革前弊稍有後法取進止

中書劉子

熙寧二年十月

准今月三日詔中書門下二府者政事之出也維是一
二股肱之臣日謨于廟堂之上皆朕所尊禮之顧其職
豈有重輕哉伏覩仁宗實錄天聖時二府之相猶以其
職高下定位則知往者不若今制之拘也今文彥博蓋
朝之宗臣朕方倚以疆垂之事雖用陳升之為宰相其
令升之仍位彥博下以稱朕遇賢之意故茲詔示想宜
知悉已降詔書如前

答詔劄子

右臣伏覩今月三日詔書宰臣陳升之位
在臣之下者朝有著定國之彛儀苟容
僭踰是紊綱紀況臣之孱薄安可克當
願寢異恩庶安孤跡兼考先朝故事止
因曹利用而行臣本書生粗知禮節事
出姑息決不敢從伏望聖慈特賜俞可

又

臣昨日奏乞班位在陳升之下及追寢
十月三日詔命

未奉指揮緣今日百官起居中書密院別班入殿即無
妨礙自來日後赴常朝中書密院同班入殿若未得請
即難以入班臣須至家居俟命伏望聖慈俯從愚懇早
降俞旨取進止

今日進呈文字畢欲再懇請又已日吁不敢留身

御批

十月五日

卿兩朝舊德顧命元勳位右升之禮體甚順其勿過為
謙抑以鬱朕待卿之志兼已降詔旨來日不可不入視

事也

答詔劄子

十月
六日

右伏蒙聖慈特賜手詔以臣累奏乞位在升之下及追寢十月三日詔命未被俞音亟頌宸翰誤獎臣以勲德令勿過為謙抑臣以謂忝備近司當守法度朝班之制不可僭踰蓋聖慈曲有褒優在愚臣固非謙抑況茲禮例之起自於利用之初臣實畏之豈可當也必冀曲軫天慈俯從人欲詔旨來日不可不入視事臣今日即

未敢隨班入殿已依稟入本院視事聽候俞旨

手詔

省所奏伏覩詔書宰臣陳升之位任在臣之下者願寢異恩庶安孤跡事具悉卿翼亮三朝周旋二府國之耆雋望實素隆升之任用尚新甫登宰席原其雅意必欲推先是用斟酌禮文裁其宜稱發于朕志奚取常規益以褒異老成豈與利用為此卿謙恭久著於此何嫌往安乃居毋逆朕命所乞宜不允付某

答詔劄子

臣累具奏乞追寢十月三日詔命及乞依儀制立班在宰臣陳升之下至今未蒙俞旨臣欲伺候陳升之正謝畢再具陳乞又檢詳儀制使相在親王之下宰臣在親王之上將來合班尤所不便伏望聖慈詳臣累奏班在升之下正朝廷素定之儀安愚臣所守之分區區之誠必期從可候勅旨

手詔

十月十六日

省所劄子奏臣累具奏乞追寢十月三日詔命及乞依
儀制立班在宰臣陳升之下事具悉卿往事仁朝再為
上宰予嘉舊德進服邇聯而固執謙撓屢形論請謂宗
祖之故雖嘗以宮使而等差而朝廷之儀亦已下詔書
而著定懇懇辭避至於再三勉從所請不忘嘉歎所乞
宜允付某

中書劄子

十月十九日

准今月十九日詔書中書門下朕為國朝之制雖兵民

分于二府然其委用者皆所謂執政之臣豈獨相樞密者以為使相耶朕嘗惑之故丙申之詔令文彥博領陳升之上所以尊老成而均政體也今彥博數言於武臣之例非可同于親王之班有未便執謙慮損情有莫回予思固然雖拒勿得其令中書門下如所請施行故茲詔示想宜知悉已降詔書如前

乞免移判永興軍

熙寧六年七月

臣近蒙特降中使賜臣移判永興軍勅牒仍傳宣旨以

關中久旱慮人心不安令臣往彼安撫一道臣內省衰
拙何以克當臣以謂朝廷嚴戒邊臣不得貪功輕舉致
有引惹若邊鄙別無事宜人情自然安帖以至方田助
役團結保甲皆非目下交切之務且令權住及罷提舉
常平之官一切委之提轉務從寬簡以絕搔撓則關輔
之民不止安帖亦可小康如此即吳中復自可安撫關
中不須愚臣誤有委付伏望聖明詳察取進止

再乞免移判永興軍

右臣近瀝懇誠乞免移判永興軍事伏蒙聖慈特賜詔書敦諭不允所乞伏念臣以齒髮衰遲久當重務聖慈矜憫方許均勞假以近藩實寬衰拙今才赴任三城尋便就移京兆況關輔之重誠非衰老可當伏望聖慈必賜矜察慎選才德付以分陝聽臣却赴河陽之任臣無任

免兩鎮第一劄子

臣得進奏官報二十六日降麻制除臣兩鎮節度使聞

命若驚不遑啓處臣以愚薄遭逢聖明祿厚位高日虞
危溢陛下曲念舊物恩禮過隆苟義有未安則禮當固
避切以本朝以來名器至慎兩鎮之重親王方授雙鉞
之貴庶官不除臣豈敢貪天之功越本朝之制覲顏不
顧冒寵以居匪惟于臣難勝實乃為國惜法伏望聖慈
特寢殊恩以全舊典令臣安分庶免責言臣無任
兩鎮之重非庶官所授頃年韓琦罷相曾授兩鎮亦
不敢當伏望聖慈矜察即賜寢罷

第二劄子

臣近覩進奏官報制除臣兩鎮節度使臣即已具表并劄子以臣之愚薄及于理必不可冒授乞賜寵罷未蒙俞可臣伏念上荷聖恩過有優獎臣今不敢全違恩旨乞祇授所加食邑實封即于老臣得安愚分臣無任激切俟命之至

臣于前奏已具陳述兩鎮之重非臣庶可授況韓琦已不敢當今臣決不可受伏望聖慈矜察仍乞貼麻

處分

第三劄子

臣于今月十一日再具劄子布露誠懇以兩鎮之命至
優至重愚臣決不敢當蓋恐自臣遂成體例臣亦上體
聖意不敢全違恩旨祇乞授食邑實封兼鎮乞從寢罷
伏望聖慈俯從所請臣無任

潞公文集卷三十五

欽定四庫全書

潞公文集卷三十六

宋 文彥博 撰

辭免

免節使請受歷頭

元豐七年

臣昨於去年十二月二十七日奉制命依舊開府儀同
三司河東節度使守太師致仕近淮西京留府准尚書
戶部符依元豐祿令出給到節使請料錢歷頭伏念臣
遭逢朝廷久更重任祿賜優厚叨竊固久本遂致仕尚

以節使優賜實難當克欲望聖慈特賜指揮止用舊令以本官請受支給庶安愚分取進止

繳納文榜

臣昨准河南府給到致仕請俸歷頭一道却開坐見任使相則例并給到一月請受俸錢榜一紙臣必謂所司差誤不敢請領亦曾審問所司堅稱新條當然即時遂具奏陳以謂休致老臣不敢冒請厚祿乞依舊制致仕官請受自後本府被省符勘會往復遷延亦已半年今

准河南府別給到依舊制致仕請受歷一道已令勾當
人請領其前來出給到文榜却令繳納訖謹具奏聞

辭免男恩命

元祐元
年八月

臣近蒙聖慈除臣男貽慶司封員外郎男居中充宗正
寺主簿仰荷聖恩不勝感戴緣臣男貽慶自省郎乞白
波輦運到任方及半年男居中係臣陳乞西京勾院皆
以便于私計兼輦運司職事自可往來西京時得省覲
所有上件告命不敢祇受已具奏乞寢罷未奉俞旨謹

再錄奏聞伏乞早降指揮取進止

臣男勾當西京勾院居中以臣亡父某此月二十三日
私忌每歲就寺齋祭兼所給假滿今已先次令發回本
任臣于西京有居宅家廟歲時須要人照管貽慶等因
官兼遂私便才候臣一向平復並令回本任

又

臣近准尚書省劄子奉聖旨以臣乞免臣男貽慶與理
轉運判官資序及男居中授宗正寺主簿不許辭免尋

具劄子陳奏以貽慶近蒙聖恩賜金紫章服今又特升
資序恩命稠疊固不可當及授居中宗正寺主簿于臣
私計不便並乞寢罷今再准尚書省劄子奉聖旨依前
降指揮不許辭免伏緣居中見任西京勾院臣先以恩
例陳乞切念臣家廟在彼今來若得居中守任彼中就
便主辦歲時享祀誠為私幸兼臣即日見有兒孫四人
守官在京于老臣左右不闕奉養其貽慶理任資序于
義固不敢當所授居中宗正主簿于臣私計實為未便

伏望聖慈察臣懇切許遂私志干冒天威不任戰越之
至取進止

又

臣近准御批臣所奏劄子為乞免臣男貽慶居中所授
司封員外郎及宗政寺主簿已依所乞今却准尚書都
省劄子奉聖旨臣男貽慶與理轉運判官資序居中不
許辭免切緣貽慶本令隨侍臣至闕下入殿日給伏蒙
聖恩賜金紫章服無功賜服義不可當累辭不從屢勉

祇受今既許免郎官却歸本任又更蒙特升資序到任未久升陟無名必致人言愈不敢當乞賜寢罷所有居中先乞西京勾院本為便于家廟歲時主辦享祀今若授宗正主簿即于家私甚為失所今日假滿已令發歸本任伏望天慈下從人欲臣不任

臣位居師保任處台司當以廉退表率周行豈敢冒竊過恩以致人言伏望聖慈矜察所有貽慶居中所授恩命必不敢當

又

臣近再具劄子陳免臣男貽慶與理轉運判官資序男
居中授宗正寺主簿蒙封還臣所上劄子准御寶批居
中以降指揮罷宗正寺主簿依舊西京勾院所所有貽慶
依前降指揮不許辭免今來居中遂免宗正主簿上感
聖恩特賜從欲所有貽慶以近蒙恩賜金紫章服今又
特升資序實以恩命稠重于義固不敢受苟或冒竊必
速人言是以不避斧越之誅再三干冒天聽伏望聖慈

察臣懇切特許寢罷此乃聖恩保全老臣晚節取進止

又

臣近累具劄子陳免臣男貽慶與理轉運判官資序及
今月二十八日簾前面繫懇誠決不敢當今尚未蒙俞
可伏望天慈早降指揮寢罷無任虔切之至

若臣男到官日久自有勞効朝廷法當酌賞即不敢
辭

免明堂禮畢賜物

元祐元
年九月

臣擬本家指使報准諸司糧料院告示以臣近遇明堂禮畢依宰臣例支賜銀絹衣帶鞍馬切緣臣久病家居不獲陪祠赴宿衛所有上件支賜義難虛授伏望聖慈特賜指揮寢罷取進止

又

臣近具劄子陳免明堂禮畢依宰臣例支賜銀絹衣帶鞍馬准尚書省劄子奉聖旨不許辭免臣昨以久疾家居既不獲陪祠宿衛復叨恩賜實難虛受于義決不敢

當伏望聖慈特賜指揮寢罷庶安愚分取進止

又

臣近以明堂禮畢蒙恩依宰臣例支賜累具劄子陳免
及今月二十八日簾前面陳誠懇今尚未蒙俞可于義
決難虛受伏望聖慈早降指揮寢罷無任虔切之至

又

臣近累具劄子及簾前面陳誠懇辭免明堂禮畢依宰
臣例支賜累奉聖旨依已降指揮不許辭免臣今不敢

屢違恩旨若全受即傷廉半給卽有例臣久以使相守
藩在外雖不陪祠宿衛亦蒙依宰臣例給賜一半臣已
令管請受給使人只依任使相比宰臣例請受一半餘
乞回納左藏庫伏望聖慈聽可取進止

又

臣近蒙聖恩以臣男貽慶陞理轉判官資序及明堂大
享臣在病假不獲陪祠宿衛依例錫賜臣累具懇辭終
未蒙開可臣忝公輔自當稍知廉恥以表率縉紳今若

不顧義理貪冒恩賞寧免人言之責必貽福過之灾所
有臣男陞資懇祈寢罷并臣經大禮支賜只乞依例給
半臣不憚再三之瀆祇祈天監察其誠懇必賜矜從臣
無任

臣以前件恩賜決知非宜必望聖慈從其所請乃所
以保全老臣晚節

免賜銀合

元祐三年九月

臣昨日奏劄子辭免御封所賜銀合今蒙批降聖旨不

許辭免臣伏思忝冒實難當授容臣俟簾對日口陳所以不可虛授之理伏望聖慈察其誠懇必賜追寢謹奏

免差人內都知管勾葬事

元祐四年正月

臣以妻王氏自亡伏蒙聖恩特差勾當御藥院老宗元傳宣宣問仍傳聖旨已差人內都知管勾葬事恩眷隆厚必不敢當伏望聖慈特賜寢罷取進止

免致仕奏薦恩澤

元祐五年五月

臣伏望聖恩以致仕依條與五人恩澤外更特與一名

官伏念臣向者蒙聖慈過聽起于休退俾忝國論無補
毫分昏耗疲癯累章特請復還故棲天幸已甚更蒙推
恩固難當克臣有堂姪曾孫常去年明堂大禮後曾奏
乞恩澤以雖是本族同居之親為服紀已絕尋別奏常
之親叔安雅得假承務郎授命數月未曾出官而身亡
臣念其本房孤遺並未有得官者今祇乞特授常一近
下名目外其餘恩澤決不敢當蓋臣前時致仕已得恩
澤于義固不可再授恩澤伏望聖慈從其誠請取進止

又

臣伏蒙聖恩以臣致仕依條與五人恩澤外更特與一名官臣即劄子奏陳以臣前曾致仕已得依例恩澤今來于義不當再授更不敢陳乞止有堂姪曾孫常去年明堂大禮曾用例奉乞以服紀已絕尋別奏常之親叔安雅得假承務郎不幸纔受命數月身亡臣念其本房孤遺並無食祿者只乞特授常一近下名目外餘恩澤決不敢當伏蒙聖慈不許辭免伏念臣寵祿過分私

門蒙恩已多無補朝廷以自愧負豈可更茲僥倖義實未安必難當克伏望聖慈特賜允臣所請取進止

謝賜銀

元祐五年四月


伏蒙聖恩特賜銀五千兩即具劄子辭免不敢克當尋奉御批不許辭免又蒙特降中旨宣諭不允臣不敢再三上瀆聖聽已祇受訖臣無任

再辭致仕恩澤

臣近准尚書省劄子奉聖旨文某致仕依條與五人恩

澤外特與一名官尋兩具奏陳臣前後蒙恩澤已多不敢克當臣有同居堂姪曾孫常一名昨遇明堂大禮奏乞推恩為服已盡礙新條不行別具陳乞常親叔安雅授假承務郎被恩之後不數月未經叅選身亡臣以常見今孤遺房下並無食祿者止乞授常一近下名目外餘乞寢罷今再准尚書省劄子奉聖旨文常特與假務郎餘依前降指揮者臣無任感恩荷戴之至所有臣今來致仕依條合得五人恩澤累具辭免難以祇受更不

敢陳之上件恩澤謹具奏聞



潞公文集卷三十六

欽定四庫全書

集部

潞公文集卷

三十七至
四十

詳校官庶吉士臣范逢思

檢討臣何思鈞覆勘

覆校官中書臣呂雲棟

校對官中書臣鮑之鍾

謄錄監生臣任應統

欽定四庫全書

路公文集卷三十七

宋 文彥博 撰

辭免

免賜公使錢

元祐五年六月

臣准尚書省劄子三省同奉聖旨文集特依前任宰相
支破添賜公使錢仍令河南府管勾支用者恭惟聖恩
眷念老臣極為優異荷戴之深如負山嶽然自來前宰
相知判州府則有搞設軍兵延待賓客以其本任不足

故有添賜之名今臣以疲老蒙聖恩從請得遂休致閑居西洛則無延客犒軍之理若授添賜極是無名臣必不敢祇受伏望聖慈許從寢罷

又

臣近蒙聖恩特依前任宰相例支破添賜公使錢臣以致仕退居里閭受賜無名乞行寢罷今准尚書省劄子奉聖旨不許辭免者然臣伏蒙聖慈矜憫羸老得遂退閑優賜無名不可冒受必賜俞允

河南府申狀

西京留府右都廳准元祐五年六月四日尚書省劄子
文某劄子奏近蒙聖恩特依前任宰相例支破添賜公
使錢臣以致仕退居里閭受賜無名乞行寢罷今准尚
書省劄子奉聖旨不許辭免者然臣伏蒙聖慈矜憫羸
老得遂退閑優賜無名不可冒受伏望聖慈必賜俞允
謹奏六月四日三省同奉聖旨令河南府將所賜公使
錢附本府公使庫收管應緣文某合用公使錢依例支

用右割河南府者右本府已帖公使庫照會去訖

又辭免公使錢

臣伏蒙聖恩依前宰相例支破添賜公使錢恭惟聖慈垂軫老臣至為優異然臣以受之無名又無前例即所賜自臣為始更啓後人之例殊不自安累奏乞行寢罷今又准河南府公文奉聖旨令河南府將所賜文某公使錢附本府公使庫收管應緣文某合用公使錢依例支用者臣既遂休致即無合用公使授受之間誠為不

便況臣閑居逸老脩然自適乃聖恩所賜餘年恩禮至厚又菽水不欲累于公私割開此例致後人攀援伏望聖恩必賜寢罷

進獎諭詔劄子

臣向以使侍中充樞密使到院後每歲依例支公使錢三分之一歲合支錢三千三百餘貫臣謂雖有舊例既無犒設所用終是無名竟不敢請累章還納蒙先帝從允賜詔獎諭今具錄進呈

許兗公使錢詔

元祐五年

據某省中書准樞密院劄子奏卿因進呈宗室公使錢文字嘗言樞密使帶節使不當例受公使錢今檢去年八月臣所奏劄子上進伏望許從寢罷事朕日則萬幾晨訪近輔而卿因錄先朝之奏草載辭舊府之公錢乃謂在外則有犒軍之常在內則無享賓僚之事顧敢受于私意願悉還于縣官朕惟德盛者必約諸身計遠者必體于國故曾子輕楚人之富何嫌義之所在汾陽佐

藩市之求衆謂忠之尤至勉從嘉舉重集褒懷所請已
從故茲詔示想宜知悉

先詔

勅省所劄子奏辭免依前宰相例支破添賜公使錢事
具悉卿舊德元老弼亮四世勤勞帝室厥功茂焉朕諮
謀始初復起自洛雍容大政亦粵四年惓惓告歸誠請
莫奪朝廷推尊禮之意有司賦公養之錢而屢剋忱辭
重開後此惟授受之恤有廉高之風脩然燕居願無塵

累靜言審計義不忍違悖史善猷勿殊內外永綏眉壽
朕有賴焉所請宜允

答詔劄子

臣伏蒙聖慈依臣所奏辭免支錫公使錢者厚賜無名
固當避免大君有命得遂允從仍降詔音過加天獎捧
承至重榮幸兼深臣無任

辭免男恩命

臣據西京進奏官李平狀申臣男貽慶除兵部郎中臣

男及除集賢殿修撰聞命之初不遑啓處緣臣男各以解官持母服將欲服滿遽蒙朝廷特此優異除授退量忝竊實難克當俟四月從吉各令赴闕躬自陳免謹先具奏聞

又

臣于三月三十日伏覩進奏官李平狀申蒙朝恩特授臣男及集賢殿修撰臣以恩出望外難以克當即時具劄子奏免至今未蒙從允今月十一日蒙朝廷降到誥

命必不敢承受兼臣男及亦自具狀陳免所有誥命已
送河南府收掌伏望聖慈早賜從允伏候進止

又

右某近蒙聖恩特授臣男某集賢殿修撰尋具劄子陳
免伏蒙特賜詔書不允者臣竊以恩命過恭懼不敢當
累具懇辭未蒙矜允恭承詔諭益重戰兢伏望聖慈俯
從愚誠特賜寢罷兼臣男及亦再具狀陳免次

又

臣近累具陳免聖恩除授臣男及集賢殿修撰恩命事
伏蒙再賜詔書不允者切念臣向者起自退休再叨重任
充位累歲訖無少補幸繫聖度再遂謝歸慙負厚恩自
知無以塞責至于所得奏薦恩例皆不敢當即蒙矜許
今仍以臣謝事無爵可加而使臣男及叙進職名復此
忝冒實難祇受兼臣男已累具辭免伏望聖慈深察至
誠早賜寢罷取進止

又

臣男及持母服初除得遂西臺閒局以便養親極為優幸更蒙進職事出無名必不敢當伏望聖慈追寢進職之命必期得請

又

臣累具狀陳免臣男及加集賢殿修撰恩命三奉詔書不許辭免屢煩訓諭恐懼不遑然義有未安不可輒已緣臣去歲獲解重任再遂退休自以居位無補不敢更當自得恩例臣嘗懇辭皆獲俞允今者臣男及叙遷撰

職復以臣致政無爵可加為名實非臣之素願所以不
避冒瀆再三必祈寢罷伏望聖慈察臣懇款特賜矜從

又

臣男及所進職名決不敢祇受俟臣男服除之後任以
繁難年歲之間稍有積効朝廷過推恩典謂之疇庸猶
可恭授今即不然伏望聖慈特寢前命俾安愚分庶息
人言臣無任瞻天候命惶懼之至

又

元祐五年
十一月

臣伏覩告命除臣男及集賢殿修撰知河陽者聖恩深厚感戴不勝切緣臣男已蒙假守藩郡私計便安極為僥倖不敢辭避所有加職之命不緣績効忝冒過優實難祇受佗日若因繁難任使稍著勞効焉敢固辭伏望聖慈特許寢罷取進止

臣男及已有奏狀辭免所加書殿之職伏望聖慈從
允

又

臣以衰老致政居洛有子孫五人蒙朝廷優假並得西
京差遣令便侍養臣以謂尸祿者過多遂乞臣第七男
及便近州郡俾之宣勞以報後祿今蒙聖慈差知河陽
并再除集賢殿修撰得郡既便加職難當尋奏乞辭免
所加職名伏望聖慈未賜俞允臣以為因自乞郡仍加
職名在于私誠實難當克伏望聖慈鑒其懇切許罷職
名臣無任皇恐候命之至

又

右臣近具劄子奏免臣男及所加集賢殿修撰職名伏
奉詔書不允者老臣無狀久忝厚恩愚子何知繼叨寵
命既難虛受須至固辭伏蒙聖恩特降詔旨曲加教諭
未賜俞從仰戴聖慈不任感荷惶恐之至謹具奏謝

臣男所加職名已別具劄子奏乞許賜寢罷

又

右臣以父子遭逢蒙朝廷擢用寵逾涯分理合再辭伏
蒙薦降詔書未從所欲仰荷聖眷俯激愚衷臣無任惶

悚之至

又

臣向以休致居洛子孫五人並除洛中差遣臣以尸祿者過多不遑啓處遂乞第七男及補郡自試尋蒙恩差知河陽并再除集賢殿修撰得郡已便加職難當尋再乞辭免職名疊蒙賜詔不允在臣父子之分尤不遑安伏望聖慈許罷職名必若年歲之間治郡稍有成績或委繁難驅使朝廷因而推恩敢不祇受臣無任懇切之

至取進止

賜馬詔書

元祐六年七月

勅某省熙河蘭珉路奏據溫溪心差蕃部青宜賒羅阿
角四以蕃書詣范育欲以駒驢驢馬一疋送與卿事惟
我宗臣名震四裔遐荒僻壤知獻厥誠朕以張闕拒羌
之獻不如旅葬昭德之致已勅邊吏答賜所直其馬今
以賜卿至可領也故茲詔示想宜知悉

奏狀

右臣伏准今月三日蒙賜詔書以熙河蘭岷路秦據溫
溪心差蕃部青宜賒羅阿角四以蕃書詰范育欲以駟
驥驪馬一疋送與卿事已勅邊吏答賜所直其馬今以
賜卿臣勘會舊例邊帥在任蕃人或有獻馬並以官物
優答其直其馬納官臣今蒙聖恩以馬賜臣實恐有異
故常特啟新例臣決不可受伏望聖慈特賜寢罷已行
之命謹具奏聞

賜到答詔

勅某省所奏伏蒙詔書溫溪心欲以馬一疋送與卿以
勅邊吏答賜所直其馬今以賜卿臣恐有異故常特啓
新例伏望特寢已行之命事具悉種羌獻誠屬我大老
雖異康侯蕃庶晝日三接以彰裴度勲德名聞四裔茲
豈故常奚煩謙避所請宜不允

熙河蘭岷路經略安撫使司公文

准元祐六年七月二日樞密院劄子熙河蘭岷路經略
司奏據溫溪心差蕃部青宜賒羅阿角四賫到蕃字稱

溫溪心文字上告熙州經略使范龍圖東京有箇文相
公自家如今獻送騮驢馬一疋告龍圖好生照管將
馬疾早送與文相公去下本司看驗得係騮驢大九
歲已送蕃部司餵養伏乞朝廷詳酌指揮候勅旨三省
樞密院同奉聖旨今范育依例估價以物作朝廷指揮
回答仍修寫蕃字送溫溪心馬以准朝廷指揮差人管
押送與文相公去也所有馬仍令學士院降詔賜與文
某今割付權發遣熙河蘭岷路經略使直龍圖范朝奉

指揮差人押送文太師交割准此右勘會本司近差管
勾河州西原堡左班殿直李震管押拂林國般次赴闕
已帖李震因便管押上件馬一疋赴致政太師衙送納
去訖伏乞照會收管

奏收

臣以西藩溫溪心送馬一疋與臣蒙朝廷支賜馬價與
溪心及蒙降詔賜馬與臣令熙河經略司報知溪心臣
以事異故常不敢受賜奏乞將馬納官蒙再降詔書不

先臣今以事小不敢頻有煩瀆依詔命祇受已別具表
謝次

潞公文集卷三十七

欽定四庫全書

潞公文集卷三十八

宋 文彥博 撰

舉官

舉李紱

皇祐二年

臣昨准例奏乞國子監直講李紱改官僉署許州判官公事准中書劄子奉聖旨李紱與權忠武軍掌書記候一年與改京官者臣于李紱本非素舊采于衆議謂有文行曾應制舉以為學官輒露奏章乞除幕職于臣竊

知人之美為國有育材之漸今經自太學講官權授外
郡掌記誠似屈其資望切慮經以學職近例更須二年
改官或聞前例自學官奏辟皆得改授合入京官兼近
歲陳執中奏辟鞠真卿充陳州通判亦以校年限未滿
特授集賢校理伏望聖慈以經在太學歲久文行為眾
所稱特賜改轉合入京官僉書許州判官公事如改轉
後本官犯正入已贓臣甘同罪取進止

舉陳湜

臣奉勅差充永興軍一路都部署安撫使切見太常博士陳湜久在河東陝西差遣深曉邊事軍政欲乞差本官管勾永興軍一路都部署安撫使司機宜文字只理本官合入差遣資序右取進止

舉馮誥任允孚

臣奉勅差充永興軍路都部署兼置制秦鳳路軍馬司公事緣秦鳳日近頻有蕃界事宜須藉經諳本處事體才幹官吏逐急差使一臣切見屯田郎中馮誥曾任秦

鳳路都監及通判秦州首尾六年並准朝廷指揮令管
勾蕃部公事深諳秦州東西路蕃情邊事本官見合入
知州差遣臣欲乞差充秦鳳路置制勾當公事兼不妨
本官待闕差遣亦無僥倖只候沿邊置制稍有倫序却
令發付本任一臣切見太常博士任允孚自慶歷三年
差管勾秦鳳路經略司機宜文字及通判秦州至去年
方替在彼十年深諳事體臣今欲乞差本官管勾秦鳳
路置制司機宜文字右取進止

舉邵叔元

臣切見三班奉職李昌來臣處公叅云奉宣差權秦州
伏羌寨監押切緣伏羌是秦州西路最大城寨控三都
谷文嬴開兩路自來屯兵之處及體當西路事宜全藉
得力寨主監押兼向來多近上或帶職班行充寨主今
來寨主是殿直謝育又差李昌權監押恐不能彈壓蕃
漢公事臣勘會秦州三陽寨押監殿直邵叔元在秦州
差遣十餘年深諳彼處蕃情邊事兼有心力欲乞就差

邵叔元充伏羌寨監押勘會東路治坊寨監押已及二年却及差李昌權治坊監押取進止

舉曹弼

臣切見秦州隴城寨監押禁曹弼好人材有膽勇方畧在秦州差遣首尾十年深諳邊情今欲滿替勘會秦州寧遠寨在西路極邊蕪寨主尹寶臣自到任一年有餘欲乞就差曹弼充寧遠寨主取進止

舉張度

臣切見自來節度使赴任例奏薦得門客一名今有太學進士張度孤寒有文行曾經省試下第在臣門館多年況近制奏薦門客更不理選出官張度欲乞特賜一試銜名目取進止

舉孟辨

臣切見提舉北京金新隄職方員外郎孟辨文學中第廉幹在公恬于進趨確然有守加以素負才武頗懷忠義曾有臣僚知其所能舉換右職伏望聖慈許召赴闕

量其人材特賜擢用

舉楊宗禮

臣切見右驎副使楊宗禮頃自廣南知州安撫却監
因言馬政先朝特召為邵牧都監到任已及二年備見
勤幹兼剏擘畫右天廡坊充孳生馬監漸有倫叙欲乞
留宗禮再任藉其經度庶有成效取進止

舉錢長卿等

臣等奉聖旨選舉官兩員與王存顧臨編修經武要略

刪定諸房例冊及今本院都副承旨提舉臣等切見著作佐郎錢長卿大理寺丞劉奉世各有學術勤于編綴欲乞差充本院編修經武要畧刪定諸房例冊官取進止

舉李端卿等

臣切見權河北監牧使周草近丁憂去職本路馬政方有倫理切要素知牧事之官相繼整齊切見群牧判官李端卿累經本司任使詳知坊監利害兼資序已深乞

差充河北監牧使兼覲都官員外郎都水監丞張訥處
事精敏乞差權監牧判官如逐官向去職事曠敗臣甘
妄舉之坐取進止

近知李端卿以家貧累重累乞外任都水監內外丞
額外員數甚多必可減那此一員

舉劉庠

熙寧六年六月

臣切見龍圖閣直學士知太原府劉庠向為諫官屢陳
讜議累經外任咸有美稱今領太原一道緝治兵防拊

綏中外紀綱振舉人情悅服臣雖遙領河東與庠義均
聯事知其善狀理合薦論伏望聖慈特與不次升擢仍
令再任所貴方面得人朝廷增重取進止

舉范純仁

年月同上

臣切見工部郎中直集賢院知和州范純仁名臣之後
能世其家忠義不回流輩推服伏望聖慈召還禁近以備
訪問必有正議仰禪聖政取進止

舉王大方

年月同上

臣切見供脩庫副使安肅軍駐泊都監王大勳臣之後敏于從事累經繁使悉有美稱臣今保舉堪充升擢任使

舉徐保申

年月同上

臣切見供脩庫副使徐保申累更邊任熟曉兵政廉良謹厚不憚勤劇見任江南東路駐泊兵馬都監將欲任滿伏望聖慈就差充河陽兵馬鈐轄替王臨滿闕

舉呂公懋

年月同上

臣切見都官員外郎呂公懋秉心堅正蒞事精敏勤職安分衆謂滯淹伏望聖慈特賜不次升擢任使

舉蘇液

年月同上

臣切見著作佐郎蘇液才資雋敏性質剛果昨在樞府供職尋以臺章去官衆謂非辜事亦尋白伏望聖慈特賜陞擢任使

舉張利一

熙寧六年六月

臣切見皇城使達州刺史衛州鈐轄張利一久更邊任

深曉事機求之輩流不可多得昨在雄州以不約束屬吏致引惹生事原情實非已事然而料度敵情應答邊機皆有倫理故北人頗憚而愛之今降為散官內遷閑職北敵頗得其計邊人深惜其去伏望聖慈體察早賜牽復知邊要州軍取進止

舉李師錫

熙寧七年五月

臣切見河陽通判李師錫才資樸茂處事幹勤前為陝西轉運判官深曉益馬之法切聞以議論寡合託以慢

公非時差替近又以前任按察之誤與轉運使一例降
官原情頗輕降奪差重伏望聖慈體察早賜牽復取進
止

舉蘇轍

熙寧六年六月

臣念伏蒙聖慈從欲均逸便藩當求時才助宣邦教切
見權留守推官蘇轍博通經術深知治體見任陳州州
學教授今已歲滿欲望聖慈就差充河陽州學教授如
臣所舉不如狀及犯正入已贓甘當同罪取進止

燕河陽累有前例奏差學官近向經奏留教授陳
安民再任自後奏充國學直講本州見今闕官

舉高惟幾

慶歷六年

臣切見益州路提點刑獄高惟幾財幹明敏長于治繁
臣頃任河東都轉運使惟幾通判麟州用兵之際供億
百端悉能幹辦昨任益州路轉運判官日造值歲飢臣
在益州首先勸誘人戶發粟賑濟遂謂高惟幾出巡外
郡勸誘人戶出粟一如益州之法甚濟飢民績狀可獎

其高惟幾伏乞朝廷特賜陞擢任使以勸勞吏如經擢
用後本官犯正入已贓臣甘同罪取進止

欽定四庫全書

澗公文目
卷三十八

澗公文集卷三十八

欽定四庫全書

潞公文集卷三十九

宋 文彥博 撰

舉官

舉楊文舉

臣切見利州路提點刑獄楊文舉廉勤幹敏前年利州
路大飢臣累牒本官體量救濟備見用心集事以致流
民不致重困伏乞朝廷特賜旌獎陞陟任使如經擢用
後犯正入已贓臣甘同罪取進止

舉田瑜

臣切見益州路轉運使田瑜材識通敏自到本路歲月未久而辦集財賦更張弊原皆有倫理今臣保舉堪充升陟任使如經擢用後犯正入已贓臣甘同罪取進止

舉李九言

臣切見太常博士李九言九經登第學術精深施行為政動有規法前任益州通判益州適值歉歲與臣協力賑濟飢民備見績効今已得替到闕切緣益州通判得

替舊例皆得升陟差使近因臣僚爭授益州通判遂停舊例止得循資而九言之職勞未錄首為新制所限伏乞朝廷體察特賜升陟任使或悉其學術任以檢討之職如經擢用後犯正入已贓或舉不如狀臣甘連坐取進止

舉張撲等

准勅節文令臣限一月內舉官三員于通判內舉成資以上一員充知州者

臣切見秘書郎通判永興軍張揆文學政事輩流所推
兼兩任陝西通判並有聲稱臣今保舉堪充知州張揆
不是見任中書樞密院及臣之親戚兼歷任中並無賍
濫及私罪情理重者如經朝廷擢用後若賍污不理苛
刻害民臣甘當同罪謹具狀奏聞

臣切見太子中允知汾州平遙縣陳湜文行純懿政事
詳敏臣今保舉堪充通判其湜不是見任中書樞密院
及臣之親戚歷任中並無賍濫及私罪情理重者如經

擢後若脏污不理苛刻害民臣甘當同罪謹具狀奏聞
臣切見秀州軍事判官鄧申稟性公直蒞官幹廉臣保
舉堪充京官知縣其鄧申不是見任中書樞密院及臣
之親戚歷任中並無脏濫及私罪情重者如經擢用後
若脏污不理苛刻害民臣甘當同罪謹具奏聞

舉蓋平等

臣近准勅保舉通判永興軍張揆充知州今准中書
劄子為張揆今任永興軍通判當知州兼以奉聖旨

候得替與試令臣依勅別舉官聞奏者

臣切見國子博士通判并州蓋平久于從政素有能聲
臣保舉堪充知州其蓋平不是見任中書樞密院及臣
之親戚兼歷任中並無賍濫及私罪情理重者如經朝
廷擢用後若賍污不理苛刻害民臣甘當同罪謹具奏
聞

臣切見屯田員外郎通判廣州張譚累更任使素有聲
稱臣今保舉堪充知州其張譚不是見任中書樞密院

及臣之親戚兼歷任中並無賍濫及私罪情理重者如
經朝廷擢用後若賍污不理苛刻害民臣甘當同罪謹
具奏聞

舉張宗益

治平二年

臣切見湖北轉運判官都官員外郎張宗益學識精深
議論宏博蒞官為政所至有聲臣今保舉堪充臺閣清
近之職所舉不如狀臣甘謬妄之坐

舉趙士宏

臣切見駕部員外郎知永州趙士宏識慮詳明敏于從政試以繁劇必能幹濟臣今保舉堪充陞陟繁難任使如所舉不如今狀臣甘謬妄之坐

舉姚復

治平二年十月

臣切見大理寺丞姚復學政精勤臨事幹敏士檢端慤為衆所知臣兩奏充掌機宜文字備見其能伏望聖慈特賜召試出身如經擢用後所舉不如狀甘謬妄之坐

舉楊遂

治平

臣切見絳州團練使楊遜出于行陣累有戰功塵軍廂
主落權涇原州總管及沿邊都巡檢使頗有績効兼年
齒方壯臣今保舉堪充管軍及邊上重難任使如蒙朝
廷擢用後不如所舉臣甘連坐

舉張揆

治平二年四月

臣切見龍圖閣直學士張揆議論堅正器識周通先朝
侍讀學士揆之弟學問優博有兄之風臣今保舉堪充
經筵之職如所舉不如狀臣甘謬妄之坐取進止

舉劉航

年月同

臣切見屯田郎中白波都大提舉輦運劉航駕部員外郎提舉在京倉草場李希逸知永州比部員外郎趙士宏並才術優長臨事精敏臣今保舉各堪充陞擢繁難任使如所舉不如狀甘當同罪取進止

舉魏沂

治平二年

臣去年夏奉制判永興軍奏辟河南府伊闕縣主簿魏沂就若充京兆府學教授未到任間臣被召赴闕沂已

經流內銓投狀情願更不赴任在銓祇候注官勘會沂
自嘉祐八年登進士第初任河南府伊闕縣主簿方十
箇月以臣奏舉罷官不成考第近知改注真定府戶曹
叅軍猶待遠闕伏緣本人久預太學生員衆所推其學
業臣今保舉伏乞朝廷改注沂西京或南京國子教授
差遣免致久罷官守妨廢資考足以推廣學業訓勵生
員

舉任逸

熙寧四年正月

臣切見都官員外郎通判鄧州任逸賦性明敏臨事精
詳臣今保舉本官堪充陞陟繁難任使如擢用後犯正
入已贓及不如舉狀甘當同罪伏候進止

舉賈青

臣勘會本路安撫司所管棣州素號劇郡兼有第十六
將官在彼駐劄近聞知州虞部郎中張昌期奏乞宮觀
差遣今切見通判大名府庫部員外郎賈青久歷事任
才用周敏伏乞朝廷就移青知棣州所貴繁劇得人如

朝廷擢任後不如舉狀及犯入已贓臣甘同罪取進止

又

臣近奏舉通判大名府庫部員外郎賈青知棣州今聞朝廷以別差下人臣勘會博州知州王休復到任已及二年以上緣本州係居黃河地分合係舉官去處兼所管就糧儲軍不少全藉得人臣切見賈青久歷事任才用周敏伏乞朝廷就差賈青知博州候王休復任滿日交割勾當所貴繁劇得人如蒙朝廷擢任後不如舉狀

及犯入已贓臣甘同罪取進止

舉范祖禹

元豐七年二月

臣切見奉議郎編修資治通鑒范祖禹文行恭守為衆所推臣曾論薦堪文館任用臣以為古之用人必因其器能如祖禹之才實堪文館任用伏乞檢臣前奏特賜任使取進止

舉富紹庭

元祐元年七月十三日

臣切以故相富弼直道逢辰昌言致主始終一節中外

具瞻向與王安石同在中書議論趨向不合義難共事
乃請出蒲遂不待年亟求致政閑居十稔不幸亡沒今
聞配享神宗廟廷公論極為允愜今弼之子惟紹度一
名監中岳廟伏望聖慈以今來配享特推恩禮于弼之
子孫更賜優加錄用取進止

舉孔文仲等

元祐元年十一月十七日

臣切見朝廷近置館閣職名修復祖宗育材養士之法
詔許大臣各舉所知三人以充其選仍立法以秘書省

官任校書郎二年正字四年並除校理伏見禮部員外郎孔文仲蚤應制舉學行純正兵部員外郎葉祖洽熙寧初進士選首殆今一十七年學術優深衆謂淹滯比部員外郎錢長卿詞藝精敏問學該道先帝嘗令撰高麗書本稱旨遂蒙獎拔三人皆曾任秘書省校書郎偶于未復館職以前就遷省郎不該新制緣逐人各在先朝已經采擢脩秘府文學之任宜在今日之選新條試職之人京官已上並除校理今來逐人已係

省郎欲乞詳逐官資地比附各除充館閣近上職名取
進止

勘會復館職新制以前曾任秘書郎者止有此三人
今後即無人援例

潞公文集卷三十九

欽定四庫全書

潞公文集卷四十

宋 文彥博 撰

舉官

舉胡宗炎

臣向于元豐七年內曾奏舉朝散郎將作監丞胡宗炎
名臣之後詞學登科乞朝廷特賜陞擢至今未蒙收採
本人今已年滿得替向在本監累經朝廷大功役均節
材料宣力甚多備見勞能伏望聖慈特除充省府官任

使取進止

舉溫俊乂

元祐二年十一月

臣切見朝請郎前監左藏庫溫俊乂廉勤公幹昨監國帑不避衆怨舉行積弊但以孤立人鮮知之伏望聖慈令三省檢其履歷特賜陞擢任使

舉宋匪躬

臣切見承議郎宋匪躬名臣之後能世其家博學多聞習知典故伏望聖慈令三省詳其家世并所履歷特除

秘書省校書或檢討之任

舉王欽臣

元祐元年
九月二日

臣勘會太僕寺近准朝旨通領外監牧司依舊郡牧司
職事本寺少卿高遵惠近日丁憂只有少卿李周一員
差往諸路相度見闕長貳管勾寺事切見工部郎中王
欽臣曾任郡牧判官并提舉陝西買馬又充駕部郎中
練習馬政欲乞差充太僕少卿填高遵惠闕緣本人曾
任陝西轉運副使兩任省郎資序已深兼其人素有文

學仍乞除一館閣職名充上件職事官庶目下便有正
官修復馬政取進止

又九月
七日

臣近以太僕寺闕官總領內外監牧事奏乞差官填闕
直累日明堂大禮齋祠中未奉聖旨今來本寺即日闕
官治事欲乞檢會臣前奏早賜處分取進止

所有初二日奏劄子恐齋祠中未經聖覽今更別繳
進呈

舉楚建中等

臣昨在西京蒙聖恩差勾當內東門梁惟簡齋賜臣手詔曲有諮詢臣勉竭愚慮上對仍詢及臣之所知賢才亟當論薦用副揀求臣當時粗舉三人應詔以久在外藩後來新進少所知識容臣博訪續具奏陳臣今早延和殿進對蒙聖旨更有薦論令進入文字來今有續具在外臣僚皆是已試有效可以因其所能而任之伏乞聖明更賜采察

一正議大夫天章閣待制致仕楚建中雖年逾七十精力強明累任重路轉運使及三司判官副使環慶真定路經畧安撫使在京主判劇司皆有風績

一中散大夫直龍圖閣知滄州李之純累任轉運使

忠厚淳正頗有時譽

一河北提點刑獄唐義問中正有守恬于進趨頗有學識善議論通時務

一知秦州直龍圖范育曾為言事官頗有學識議論

不屈

一河北轉運判官杜純堅正有守累以公事黜降衆
謂理直終不自明縉紳多稱之

一知懷州朝散郎黃景學行敦篤有古儒士之風可
脩勤講之職

右謹具奏聞謹奏

又

臣于去年六月中曾入劄子應詔續舉官六員今聞多

已施行內一員前知懷州黃景未見施行問得中書言
未見文字切慮遺墜不達輒敢錄元劄子進呈其黃景
伏望聖慈采察特賜擢用取進止

今早已曾面奏奉聖旨令別進劄子

舉杜訢等

元祐二
年二月

臣伏以近者獎恬退之士抑躁競之風竊見衛尉少卿
杜訢賢相之後能世其家久歷省府之任素有老成之
稱太僕少卿李周恬靜有守當官不撓向為監司以直

道被黜久安閑職宣德郎揚國寶安貧守道恬于仕進
器識深遠才力有餘雖近除太常博士未盡其才試太
學博士呂太臨強學篤行有古儒之風杜門十年以講
學自樂經術通明聞譽夙著雖蒙召寘太學以親嫌未
極其用已上四人伏乞特賜擢任取進止

舉唐義問

元祐二
年五月

臣切聞就差河東轉運使副唐義問知荆南緣荆南帶
湖北一路都兵鈐兼統押近畷蠻夷地望重于河南又

聞廣西蠻人潛結荆湖兩路蠻首作過極要彈壓今來
唐義問只以近下散官知荆南慮事體不重兼近有謝
麟自知邠州移知潭州帶直秘閣葉均以秘書少監知
荆南帶直龍圖閣從來體例甚多伏乞朝廷特與檢會
諸例令唐義問兼帶館閣職名知荆南所貴夷夏稱呼
有所增重方面事體取進止

舉張守約

元祐三年五月

臣切見東上閣門使廊延路馬步軍副總管張守約累

經陝西任使熟知邊事深曉兵政但以忠勤孤直進身
不苟今雖年過七十精力甚強而官止橫行使額欲望
朝廷察其人材履歷特賜擢充正任以獎久勞

舉邢佐臣

臣切見左藏庫副使定州路鈐轄邢佐臣累經河北河
東任使深曉邊事熟諳軍政頗以忠義自任不苟求進
今年過七十精力強明尚淹諳司副使伏望朝廷察其
履歷人材擢充正使兼帶遙郡以獎忠義

舉包綬

元祐三年十月二十七日

臣切見故樞密副使包拯身脩忠孝秉節清勁直道立
朝中外嚴憚先帝以其德望之重擢為輔臣未盡其才
不久薨謝舉朝痛惜之今其子綬見任宣義郎僉書濠
州判官能世其家恬靜自守不苟求進士人稱之臣伏
見近獎用劉敦夫呂由誠皆以其父呂誨劉庠之故如
包拯之後惟綬一身孤立不倚臣以謂宜蒙獎擢以旌
名臣之後取進止

舉張雲卿

臣切見蔡州真陽縣尉張雲卿素有學行清介自守安貧守道未嘗苟求應進士舉晚霑一命士人惜之兼雲卿通經博古欲望特除一西京學官必能表帥諸生亦可敦勸薄俗取進止

舉尹復湊

元祐四年

臣切見同五經出身尹復湊素有鄉行頗深儒學累有公卿薦論及蒙朝廷旌賞前歲科場本州又以經明行

修薦其二人于朝廷去年復湊殿試為第一名其弟復性充第二名今又聞本路監司奏復湊乞充宣聖廟教授闕考其行實極稱其任伏望聖慈特賜依奏充庶使闡揚鄒魯之素風欽承周孔之聖教取進止



潞公文集卷四十